



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

Tir Yimym

tiryimym@aolima

tir yimym

TAPAK 3

Dipa Karmakar nem ita 21  
tenokdangba agütsü

Kejriwal-i maneni LG dang tesayurtem  
Finland-i yoktsü mepishir

VOL. XX NO. 114 (ADOK 114) DIMAPUR

AMUNGNÜ (SUNDAY)

TSÜKLAI (FEBRUARY) 05, 2023

₹ 5.00

## ENPO-i election mokdangba agiener

**Dimapur, February 4, 2023 (TYO):** February 27 Nagaland Assembly election atema nomination asütsü anogo asem dang lia Eastern Nagaland Peoples' Organization (ENPO)-i Honibarnü election mokdangba agienogo.

Ministry of Home Affairs (MHA)-i ENPO indang August 26, 2022 bangzüng meyipa reprangshitsü mepishiba sülen Honibarnü Dimapur nung sanen ENPO luden senden ka amendang iba lemtet agiogo.

ENPO-i nübortem dang sorkar den yaritepa election agütsü aser ENPO tesem nung law & order khuret kecha malitsü atema mepishia metetdaksü.

Union Home Minister Amit Shah-i February 2, 2023 nü ENPO ketdangpurtem dang nangzükba indang senden nung lemsatop aser telok ajak den jembitepba sülen election mokdangba agientsü lemtet, ta tanü ENPO sangdong ka nung metetdaksü.

Telok anaprongi mulungtepba ama election maparen tembangba sülen mapa inyaksü ta Union Home Minister-i ENPO dang nangzük.

Union Home Minister aser MHA, GoI dak tamang kaa ENPO-i Nagaland nung election tiptema agütsü atema August 26, 2022 bangzüng agiener, ta parnokisa metetdaksü.

ENPO-i democratic maparen pusema nungitba atema pelar ta Union Home Minister Amit Shah-ia metetdaksüogo.

"Prime Minister Narendra Modi-i Northeast India nung alirtem dang sorkar parnok den dena lir ta shiyonga arur aser ENPO-i election nung shilem agütsü lemtetji Centre-i inyakba mulunga agizükba kuli lir" ta Amit Shah-i Twitter nung ashi.

ENPO lemtet ajanga yimjung aser terenlok atema inyakba mapa nung tetsükdaksü kecha majurui inyaka aotsü, ta Union Home Minister-isa metetdaksü.

## Tanü candidate 6-i nomination file süogo

**Dimapur, February 4, 2023 (TYO):** February 4, 2023 nü Nagaland nung political party balala nung candidate 6-i nomination süogo aser parnok rongnung standby candidate ka dena lir, ta Chief Electoral Officer, Nagaland-i metetdaksü.

Tanü Nationalist Democratic Progressive Party (NDPP) nungi tetsür candidate Mrs. Salhoutuonuo Kruse-i 8 Western Angami Assembly Constituency nung tokteptsü

atema nomination file asü.

Tanü nomination asürtem tsünglangen agütsür:

1. N. Jacob Zhimomi - BJP (4-Ghaspani-1 A/C)
2. Salhoutuonuo Kruse - NDPP (8-Western Angami A/C)
3. Y. Vikheho Swu - NDPP (13-Pughoboto A/C)
4. Joel Naga - RPP (12-Tseminyu A/C), Gwalozu Kath (Standby) - RPP (12-Tseminyu A/C)
5. Dr. Neisatuo Mero - IND (16-Pfutsero A/C)

## Nagaland Police-i NPRIS sen agütsüogo

**Dimapur, February 4, 2023 (TYO):** Nagaland Police Department-i Nagaland Police Risk Insurance Scheme (NPRIS) kübok department nung inyaka lia asür nisung 98 kinunger nem sen agütsüogo.

"Tasür kibongtem nem agütsüba sen ajak agi Rs 1,16,65,407 liasü aser nisung karbo küm 2 tashi sen magütsüi aruba atema department-i sasar" ta Director General of Police

Nagaland, Rupin Sharma, IPS-i sangdong ka nung metetdaksü.

Tarutsü nungi Nagaland Police Department-i nisung asüba mesüra mapa nungi sodi agiba sülen ghonda 48 tsüngda nung NPRIS dues agütsüsü ta paisa ashi.

Nagaland Police Department-isa staff aser parnok kibongtem dang parnok bank account nung senotsü aitba reprangdangang ta shiogo.

## Nagaland nung taruba sorkar nung JDU adentsü

**Dimapur, February 4, 2023 (TYO):** Nagaland nung taruba sorkar akümtsü atema political party tulutiba rongnung tasembubaji Janata Dal United (JDU) lir.

Iba osang ya Honibarnü JDU Nagaland president NSN Lotha-i metetdaksü.

Nagaland nung NDPP-i aniba sorkari taruba sorkar akümtsüsa menden peria mangutsü. Iba jagi sorkar akümtsü atema party tasembuba ka nungdaksü, ta NSN Lotha-i ashi.

Nagaland kübok constituency ka nungi JDU lennir kari party toktsüba atema NSN-i ashiba agi "iba ajanga party dak kecha mekongshir aser party shitak dang lir."

"Political party ka ama takhangba ajakbo meinyakteter aser party züngsem kari toktsüba ajanga party makoksar" ta paisa metetdaksü.

Onoki candidate temi agütsüba application tem jungjunga reprangdar aser iba sülen candidate tem shimtsü ta NSN Lotha-isa metetdaksü.

## Congress, NPP & LJP-i party tickets lemogo

**Dimapur, February 4, 2023 (TYO):** 14 buba Nagaland Assembly elections atema Congress-i candidate 21 nem party ticket agütsüogo.

Honibarnü Congress Bhavan nung ticket alemba den manifesto sayaba sentong ka ayongzükba agia liasü.

Congress indang election manifesto ya 'vision statement' lir aser onoki iba alizüing atongtsü atema nangzükba ir. Congress-i Naga nung kümzükba ayutsü aser candidate 20 temai party ticket meshiba atema onok pelar, ta NPCC president K Therie-i ashi.

Taküm election nung Therie-i 1 Dimapur 1 assembly constituency nung tokteptsü.

"Taküm NLA election nung telok kechaia sorkar akümtsüsa takok mangutsü aser Congress-i asen tamang kümzükba ayutsü aser Tsüngrem taochi dena raratsü" ta pai ashi.

Tanü Congress-i ticket angurtem:

Dimapur-I K. Therie, Dimapur-II S. Amento Chishi, Dimapur-III V. Lasuh, Ghaspani I Akavi N Zhimomi, Tening-Rosy Thomson, Northern Angami-II Seyievilie Chachu,

Chozouba- Vapurmu Demo, Phek- Zachilhu Ringa Vadeo, Mongoya- S Supongmeren Jamir, Aonglenden- Toshipokba, Akuluto- Khekashe Sumi, Wokha town- N Wobenthung Lotha, Sanis- Yanchamo Ovung, Tizit-Er. T. Thomas Konyak, Phomching- T Ngampai Konyak, Aboi- C Manpon Konyak, Longleng- Denngan Y Avennoho, Tuensang Sadar II- Z Throngso Yimkhiung, Shamator Chessore- W Akum Yimkhiung, Seyochung Sitimi- S Khaseo Sangtam aser Pungro Kiphire- T Atsuba Yimkhiung nung lir.

**NPP:** Honibarnü National People's Party (NPP)-ia candidate tem indang mezüngbuba tarensen metetdaksüba nung nisung 12 nem ticket agütsüogo.

NPP-i Nagaland kinük ajaklen temelenshi bener arutsü. NPP-i khen dangbo temelenshi bener marutetsü saka mapang agia terenlok bener arutsü ta parnoki metetdaksü.

NPP ticket angurtem:  
6 Tening- Zandi Domta, 17 Chizami- Vevoyi Vadeo, 18 Chozouba- Veprasa Nyekha, 22 Arkakong- Nuklutoshi, 22 Angetyongpang- Maongkaba

Ozukum, 40 Bhandari- Tsungro Kithan, 42 Wakching- Honang Lessu, 43 Tapi- Epah Konyak, 48 Moka- Nyamnyeie Konyak, 57 Thonoknyu- Benei M Lhamthiu, 59 Syochung Sitimi- Kipili Sangtam aser 60 Pungro Kiphire- T Setsathong.

**LJP(RV):** Maneni, tanü Lok Janshakti Party (Ram Vilas) Yuva president Pranab Kumar-ia candidate 19 nem party ticket lema agütsüogo.

**LJP (Ram Vilas) ticket angurtem:** Dimapur-I Viloto Pukhato, Dimapur-II Y Vikheho Awomi, Dimapur-III Azheto Zhimomi, Ghaspani II Kitoho S Rotokha, Tseminyu- Er. Levi Rengma, Pughoboto- Dr. Sukhato A Sema, Chizami- Kevechutso Doulo, Chozouba- Dr. Chotisuh Sazo, Meluri- Yitachu, Zunheboto Ghovishe Kiba, Satakha- Zheito Chophy, Sanis- Sulanthung H Lotha, Wakching- Y M Yollow Konyak, Tehok- Chingkaie Konyak, Tamlu- B Bangtok Phom, Tobu- Naiba Konyak, Thonoknyu- L Khumo Khamniungan, Shamator- Chessore- R Tohanba aser Pungro Kiphire- S Kiusumew Yimchunger.

## Nagaland election ajanga Naga yimten latettsü lenmang lapoktsü

**Dimapur, February 4, 2023 (Agencies):** Nagaland nung election agiba ajanga Naga yimten ken o atema tatemang lemtet agütsü lenmang lapoktsü ta Assam Chief Minister Dr. Himanta Biswa Sarma-i ashi.

Honibarnü BJP candidate Jacob Zhimomi-i 4-Ghaspani-1

A/C nung tokteptsü atema Dimapur nung nomination file asüidang CM Sarma-i pa meina aru aser idangji pai osangbener den jembidang iba olen ashi.

"Naga yimten latettsü atema mapa inyakdar aser election mapang nübortemi parnok taginübatem lemsateptsü. Iba

ajanga election ajanga Naga yimten latettsü asoshi lenmang lapoktsü" ta Sarma-i ashi.

Nagaland assembly elections nung NDPP-BJP teloktep ajanga takok tulu angutsü. Party ana longjemer raratsü aser takok angutsü, ta paisa shisem.

## Nagaland nung yi, mozü aser osettsüset maneni apur



Nagaland Police-i tesem balala nung yi raksa endokba angur.

Shanavas C IAS-i metetdaksü.

SST Team-i senji bangdak ketdangsürtem nem agütsüogo ta paisa ashi.

February 3, 2023 tashi nung Centre aser State indang Enforcement Agency balalai Rs.28,96,37,474 tashi puogo, ta Chief Electoral Officer, Nagaland-i sangdong ka nung metetdaksü.

February 3, 2023 nü Rs. 2271318 jenjang yi litre 3464.46, brown sugar 0.003 kg, SP capsule 78 nos aser Rs. 4016850 alang sunflower (drug) apu.

Maneni, Rs. 17191832 alang election nung alemba osettsüset puogo, Media Cell, CEO, Office, Nagaland ajanga metetdaksü.

1. Cash = Rs. 24525350.
2. IMLF (40925.65 Litres) = Rs. 30202492.
3. Drugs/Narcotics (3.06 Kgs) = Rs. 217717800.
4. Other contraband = Rs. 289637474.
5. Freebies/other items = Rs. 17191832.

**Dimapur, February 4, 2023 (TYO):** Nagaland nung Model Code of Conduct tenzükba sülen nungi Nagaland Police Department-i state ajungalen mita aodang IMFL aika puogo, ta SP (SCRB) & PRO PHQ-i metetdaksü.

Nagaland Police-i anogo balala nung okadak nungi temelaba meshiba sülen yi litre 3,068 aser IMFL pongdang 7,843 tashi raksa endokogo. Magistrate, Dobashi aser tangartem tsüngdang yi raksa endok, ta paisa ashi.

IMFL raksa endokba nung

CP Dimapur nungi 7,843, Mokokchung DEF nungi 2,494 aser Longleng DEF nungi litre 339 liasü.

Nagaland nung election tiptema aser ochishia agitettsü asoshi public teyari maneni nungdaker ta Nagaland Police-isa metetdaksüogo.

February 4, 2023 nü Kohima nung Election Expenditure Monitoring (EEM) Cell ajanga Rs 2,50000 apu.

Peducha nung mita reprangdang Manipur leni aoba gari ka ka nung senji bena aliba apu, ta DC & DEO Kohima,

## Nübur sadema yaritettsü mechi BJP nungi tokteptsü telemtetba agi : Imkong L.Imchen



Tanü Imkong L.Imchen Mokokchung nung par kidang pa BJP ticket amer 14 Buba Nagaland Legislative Assembly Election nung tokteptsü asoshi sangdongba sentong nung jembidang tangokba noksa.

**Mokokchung, Tsüklai/February 3(TYO) :** Wb. Imkong L.Imchen Bharatiya Janata Party(BJP) ticket amer 28th Koridang Assembly Constituency nungi 14 Buba Nagaland Legislative Assembly Election nung tokteptsü asoshi sangdongogo.

Nübur tenzüker ka ama nüburtem tenzüksü aser yaritettsü asoshi takok angur telok nung adentsüla ta asüba tangatetba nung BJP ticket amer election nung noktaksü mulungtet ta Wb.Imkong L.Imchen tanü par kidang pa meyonger adenshia aliba nüburtem dang ashi.

Imkong L.Imchen-isa taoba küm pungo opposition nung alidang Koridang nüburtem aser Naga nunger meyaritet, aji asünung takok sabang ka nung noktaker nübur yaritsülata anagteta BJP nung aden ta paisa shisem.

2018 küm BJP nungi tokteptsü asoshi bilem saka NPF party nungi toktep saka tang BJP party nungi toktepbaya, takok angutsüta asüba tamang akar aser Tsüngremi mulungba ka ta angateterta paisa shisem.

Tanu Mokokchung nung Imkong L.Imchen-er kidang pa BJP ticket amer arua pa BJP

nungi tokteptsü sangdongba sentong BJP Mkg.District,President, 28 Koridang Mandal President, Mangmetong Village Council Chairman, Khensa Village Council Chairman, Yimyu Ward Yimden, Mangmetong Senso Telongjem Kohima Tir ,Mangmetong Senso Telongjem Dimapur Tir aser Mangmetong Senso Telongjem Mokokchung Tir nungia tayongzükba o tatsütsü jemi aser iba sentong nung Tsüngrem lenisüba jazüka Rev.Luin Jamir-I sarasademba den iba sentong Wb.A.Mayang Imchen Ketdangsuba nung agia liasü.

## Advisor Zale Neikha NCP nung denogo

**Kohima, Tsüklai/February 4 (TYO):** State Assembly election atema NDPP ticket magütsüba sülen 15 Southern Angami -II Assembly Constituency nungi MLA aser advisor for Youth Resources and Sports, Zale Neikha Nationalist Congress Party (NCP) nung denogo.

Pai par yimtsüng Viswema nung election atema nüboyimba sentong tenzüker mapang iba osang sangdonga liasü aser ashiba agi, tang tinyakdak MLA ka ama pai par constituency nung terenlok tali atema nüburtem tejangraba toktsütsü kecha tebilemba mali.

Pa pusemertem aser NDPP

15-SA-II Assembly Constituency Unit, shirnoki pa den Tazwe-o Kita, R Khel Viswema-i aotsü telemtetba agia liasü, parnok den o jembiba mapang Neikha-i, NDPP- BJP na menden lemsar election toktepta ajanga pa nem taküm NDPP ticket magütsüaka nüburtem tenzüksü atema pai election nung maneni tokteptsü aser NCP candidate ka ama tokteptsü telemtetba agiogo, ta ashi.

2018 küm pa NDPP ticket nungi toktep aser NPF candidate Kropol Vitsu vote 771 agi koka liasü. Taruba election nung takok tajung angutsü atema Neikha-i nüburtem dang parnok teyari

asera temaotsü meshia liasü.

Paisa, mapa metembang alibateman maneni tejakdang bener aotsü aser lenla ajak nung nüburtem terenlok asoshi bendanga agütsü inyaktsü tenangzükba agüja liasü.

Maneni Neikha-i, nüburtem dang takok angutsü atema longjemer inyaktsü ayongzükba liasü.

Iba sentong ya Vitsorel Lcho lenisüba nung agi aser Viswema yimtsüng kübok Z. Khel & P. Khel nungi lenirtem aser Kuzhama, Kezoma, Kezoma Urban Station aser Sakhabama yimtsüngtem nungi lenirtemia shilem agia Neikha takok asoshi imlaja ataba lemsatapa liasü.

## Temesepba mozü dak sendakba nung tenokdangba agütsü

**Dimapur, Tsüklai/February 4 (TYO):** 2012 küm September ita 17 nü sangdongba aser state nung temesepba mozü ajanga timtem aser tetsükdaksü aika adokdaksüba den mozütem shibelenba dak ajemdaker Nagaland sorkari state nung osang agütsüba anogo nungi tenzüker teküboklen agüja aliba mozütem mayoktsü, malemstü aser rizünga mayutsü atema tetuyuba agütsüogo.

### Terms:

#### Mozü tapu balala

1.Codeine & its salts, 2. Psychotropic Substances 3. Tramadol 4. Ketamine 5. P e n t a z o c i n e , 6.Pseudoephedrine.

Licensed premises ka nung ita shia permissible quantities (Irrespective of manufactured

brands):-

Category - 1 (Dimapur, Kohima & Mokokchung)

**Wholesale:** 1. Oral liquids, 2.Solid dosage, 3.Injectables,

**Retails:** 1. Oral Liquids. 2. Solid dosage, 3. Injectables

Category - 2 (State kübok tanga districts ajak atema)

**Wholesale:** 1. Oral Liquids: 1000 (One thousand) phials

2. Solid dosage : 3000 (Three thousand) Tablets

3. Injectables : 500 (Five hundred) vials/ampoule

**Retails:** 1. Oral Liquids : 30 (Thirty) phials

2. Solid dosage: 200 (Two hundred) Tablets

3. Injectables : 10 (Ten) vials/ampoule

Temetetsükaji active ingredient ajak atema maximum

limit (tatishitsü; brand ajak atema codiene aketba cough Syrup indang maximum limit ji Category-1 atema 5000 Phials aser Category-2 atema f000 Phials).

### Conditions:

i. Tenokdangba agütsür aliba mozütem atema certificates tem District Chief Medical Officer Office den attach süa aliba Drugs Control Administration ketdangsurtem ket nungi meshitsüla.

ii. Wholesale dealer temi, Drugs Control Authority-i agütsüba indent certificate bena aliba licensed retailers tem dang dang iba amala tenokdangba agütsür aliba mozütem ayoktsü.

iii. License bena aliba wholesaler aser retailer

## Kohima DC-i SVEEP campaign bicycle rally tenzüksü

**Dimapur, Tsüklai/February 4 (TYO):** Systematic Voters Education and Electoral participation (SVEEP) Campaign kübok "No Voter To Be Left Behind," omen nung ajemdaker Bicycle Rally ka February 4 nü DC office Kohima nung tenzüker aser Raj Bhavan nung tembanga liasü.

Sentong tatsüka agiba mapang DC & DEO Kohima Shanavas C, IAS-i, district nung SVEEP rally ayongzuka agiba nükjidongji nüburtem nem election indang tangazükba agütsütsü aser nisung kar dak danga kongshitsüsa osang bener aotsü asoshi lir, koba ajanga temelenshi tulu adokdaksütsü

kechiyong vote ajak azüngtsü aser vote ka danga metoktsütsü, ta ashi.

Paisa, iba rally ayongzükba agiba nükjidongji election ya ajak atema kümdaksütsü asoshi lir ta ashi. Maneni pai, sentong nung shilem agirtem dang kanga pelaba lemsatep aser parnok dang tarutsü tajungba ka küma melenshitsu atema election nung shilem agitsü atema nüburtem ajungmesotsü ayongzük.

Iba sentong ya Peniel CRC, Billy Graham Rd pastor Khrieneu Metha-i sarasademer tenzüker koba DC & DEO Kohima-i ayongzükba liasü. Iba rally nung rider noklang aikati shilem agia liasü.

## Chumoukedima nung clean election atema marathon race aser cancer awareness sentong agi



**Dimapur, Tsüklai/February 4 (TYO):** District Election Office, Chumoukedima, aser Department of Education, St. Joseph University na longjemer February 4 nü clean election atema marathon race ka den repsema World Cancer Day nüngdem nung cancer awareness sentong ka ayongzükba agiogo.

Marathon asemtepa ya 7th Mile junction nungi tenzüker aser St. Joseph University campus nung tembanga liasü. Marathon asemtepa nung St. Joseph University nungi kaketshir aser tesayur 250 shi-i shilem agia liasü.

Marathon asemtepa ya tebandang kecha makai

ochishia election agitsü atema nüburtem nem tangazükba agütsütsü aser iba den public health ken o ka ama cancer tashidak indang tangazükba agütsütsü aser iba anema jenjang tapet agitsü atema ayongzükba liasü.

Marathon asemtepa ya Public Relations Officer, Fr. L. Anish-i tenzüksü. Asemtepa ya B.Com 4th Semester, Dept of Commerce Kaikho Bonifac-i akok aser tanabuba aser tasembuba jenjang nung Rukuvisal Jediah Rhetso BA 2nd Semester, Department of Political Science aser Pekiye T. Achumi BA 2nd Semester, Department of Political Science na liasü.

napronglai iba amla mozütem licensed dealers dang nungi dang alizüka ayoktsü.

iv. License bena alirtem ajaki iba amala mozü ayokba aser aliba indang register/record balaka ayutsüla aser Drugs and Cosmetic Rules 1945, Rule-65 dak ajemdaker Drugs Control officers-i asadangtsü.

v. Drugs and Cosmetic Act & Rules kübok provision tem dak ajemdaker license agütsütsü.

### Seizures And Legal Proceedings:

i. Iba tetuyuba sülen manidakba licensed premises (Pharmacies) tem ya Drugs and Cosmetic Act 1940 nung tetuyuba agütsür aliba ama Drugs Control Authority

densema aliba mapang nung dang meita aotsü aser aputsü.

ii. Licensed premises tema nung license bena alir ka apuba aser meita aoba.

iii. Police, Custom, Excise aser tanga Arm Forces temi apubatem Drugs Control Administration, Department of Health and Family welfare dangi abentsü, kechiyong Drugs and Cosmetic Act 1940 and Rules 1945 and empowered under Narcotic Drugs and Psychotropic Substances Act 1985 kübok Drugs Control Administration, Department of Health and Family welfare ya Nodal Agency lir aser parnok nem administrative mesüra legal jenjang agitsü tashi agüja lir.



February 04, 2023 nü Uttar Pradesh kübok Prayagraj nung aliba Allahabad High Court nung Allahabad High Court Bar Association kum 150 ajungba anogomong sentong nung Union Law & Justice Minister, Kiren Rijju aser Supreme Court Judge, Krishna Murari na adenba noksa nung angur.

### SC-i state 7 dang anti-conversion ozüng indang telangzüba meshir

New Delhi, Tsüklai/February 04 (Agencies):

Anti conversion ozüng benokba anema temepishiba ken otem dak sendakba nung Supreme Court-i anti conversion ozüng aliba state dang telangzüba agüjang, ta tuyuogo.

Tamangba yimsü ka nungi kati meyiptsü atema ketdangsertem dang nungi jelia temelaba meshitsüji Religious Freedoms Act kübok asü, ta ashishia SC nem temepishiba ken o agütsü.

Parnokisa, anti conversion ozüngtem ajanga tamangba yimsü temeden alema inyaker, ta ashi.

Anti conversion ozüngtem

ya Uttar Pradesh, Madhya Pradesh, Gujarat, Himachal Pradesh, Uttarakhand, Karnataka aser Jharkhand state tem nung benoka lir.

Senotsü agi mesüzüka yimsü meyipdaksüba aser ashikulak ajanga yimsü meyipdaksüba nokdangtsü atema item state nung anti conversion ozüng benoka lir.

Chief Justice DY Chandrachud aser Justice PS Narasimha nati akumba bench-i item state tem dang, court nung benoka aliba temepishiba ken otem dak sendakba nung telangzüba agüjang, ta tetuyuba agütsü.

Supreme Court-isa peipei state nung aliba High Courts nung ken o benoka alirtem dang, kechiba nenoki benokba ken otemji Supreme Court-i mebelentsüla, ta asüngdanga telangzüba meshi.

Sorkar tenüng nung jembir Attorney General R Venkataramani-i, "Peipei state dak apet item ozüng dak sendakba nung obendang agütsütetsüsa high courts ji temsüa lir," ta ashi.

CJI-i aniba bench-i maneni tarutsü nung iba ken o angadanga mapang nung Attorney General-i ashishiba ken otemji angadangtsü, ta ashi.

### Kejriwal-i maneni LG dang tesayurtem Finland-i yoktsü mepishir

New Delhi, February 04 (Agencies):

Honibarnüa Delhi Chief Minister, Arvind Kejriwal-i lepshia Delhi Lieutenant Governor (LG), V K Saxena dang Delhi sorkar school tem nungi tesayurtem training agitsü atema Finland-i yoktsü temelaba agüjang, ta mepishio.

AAP lenir aser Punjab Chief Minister, Bhagwant Mann-i sorkar school balala nungi principal 36 training agitsü atema Singapore-i yokba sülen mapang tatsüka tsüngda Kejriwal-i twitter ajanga Delhi LG dang tesayurtem training agitsü atema Finland-i yoktsü melaang, ta mepishi.

Kejriwal-i Hindi oshi agi twitter ajanga, "Tanü principal 36

training agitsü atema Singapore-i yokogo. Iba ya Punjab nung tanurtem tarutsü jenjang ajungtsü atema lir. Ni LG dang Delhi nungi tesayurtema training agitsü atema Finland-i yoktsü atema temelaba agüjang ta mepishir. Kechiba nai Delhi nung tesayurtem aser tanurtem sempar?" ta metetdaksü.

January ita tetenzüklen Delhi Deputy Chief Minister, Manish Sisodia-i Delhi LG aija, LG-i tesayurtem training agitsü atema Finland-i yoktsü memelaba ya AAP sorkar indang "education model" anema inyakba mapa lir, ta aija liasü.

Manish Sisodia-i, LG Saxena-i Chief Minister aser

Education Minister-i agiba telemtetbatem agientsür, aser ibaji ajanga Delhi nung tanurtem akoksatsü, ta aija liasü.

Delhi nung AAP sorkari State Council of Educational Research & Training (SCERT) nungi primary teaching in-charges aser educators training agitsü atema Finland-i yoktsü telemtetba agia liasü saka LG-i ashishir.

AAP sorkari Singapore, Finland, Oxford aser Cambridge ama shisaliok jenjang kanga junga aliba linüktem aser rejtem nung training agitsü atema tesayurtem yoka arudar, aser ibaji ajanga Delhi sorkar school tem nung board exam results tajungba akümer.



February 04, 2023 nü Delhi excise policy ken o dak sendakba nung New Delhi nung BJP züngsemtemi AAP office kima Delhi Chief Minister, Arvind Kejriwal anema longkak aitba noksa nung angur.

### February 6 nü PM Modi-i HAL indang helicopter factory semzüksütsü

New Delhi, February 04

(Agencies): February 06, 2023 nü Karnataka kübok Tumakuru nung Ato kilonser, Narendra Modi-i linük atema Hindustan Aeronautics Limited (HAL)

indang helicopter production facility ka semzüksütsü.

Greenfield helicopter factory ji ali acre 615 nung yanglu; linük nung nüngdakba helicopters peria yanglutsü nükjidong nung iba factory yangluogo, ta Honibarnü defence ministry-i sangdong ka ajanga metetdaksü.

India nung helicopter manufacturing facility tulutibaji ibai asütsü aser mezüngbo iba factory nung Light Utility Helicopters (LUHs) dang shia lir.

Hindustan Aeronautics

Limited (HAL)-i kum 20 tsüngda touzük ton 3 nungi 15 tsüngda helicopter 1,000 dak tema yanglutsü aser iba nungji sen 4 lakh crore shi indoktsü.

Helicopter factory semzükba sentong nungji Defence Minister Rajnath Singh den Ministry of Defence nungi tongti ketdangsertem adentsü.

Light Utility Helicopters (LUH) ya linük nung design asü.

Shilem balala lemsar mezüngbo iba factory nung kum shia helicopter 30 shi dang yanglutsü, iba sülen kum shia helicopter 60 yanglutsü aser tesülenbo kum shia helicopter 90 yanglutsü, ta Defence Ministry-i metetdaksü.

Mezüngbuba LUH ji tendangogo aser semzüksütsü renema dang lir, ta parnokisa metetdaksü.

**SBI State Bank of India**  
STRESSED ASSETS RECOVERY BRANCH, JORHAT  
Na-Ali, M G Road, Jorhat, Opp. ASEB Building, PIN-785001 (Assam)  
Tel No : 0376-2300193 / 2300204

[Rule - 8(1)]  
**KIOJENAGIBA NOTICE**  
Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsünglanglen sign süa aliba State Bank of India officer-i 10.06.2019 anogo nung Demand Notice ka ajanga sen apur **Shri Phushito Ayemi, Proprietor of M/s. Ayemi Bamboo Products aser Shri Phushito Ayemi, Guarantor of M/s. Ayemi Bamboo Products** dang notice agütsüba anogo nungi tenzüka anogo 60 tsüngda notice nung shia aliba ama sen 2,13,42,360.49 (Rupees Two Crore Thirteen Lacs Forty Two Thousands Three Hundred Sixty and paise forty nine only) agüjang, ta tuyua liasü.

Ajisüaka sen apuri senji magütsüet nung sen apur/Guarantor aser nürurtem dang tsünglanglen sign süa aliri iba Act kübok Section 13(4) aser Rule 8 nung agüja aliba tashi amshia 2023 kum January 31 nü tsünglanglen shia aliba kiojen agiadokogo, ta sangdonger.

Sen apur/Guarantor aser nürurtem dang iba kiojen dak sendakba nung kechia inyaksangshi masütsü metetdaksür aser kari danga tetuyuba anema inyakra State Bank of India-i sen 2,13,42,360.49 den 11.06.2019 anogo nungi tenzüka tetemlok meshitsü.

Sen apur dang iba Act nung Section 13 kübok sub-section (8) nung aliba ama mapang shidak nung item kiojen alanzüksütsü atema inyaksütsü metetdaksür.

**KIOJENOSANG TEJANGJA:**  
Dag No: 474 Patta No: 138, Under Block: Naharbari (PK), Mouza No: 3, Dimapur, Nagaland nung Shri Phushito Ayemi tenüng nung aliba kimong 1 Bigha- 1 Katha- 6 Lechas (18144 Sq Ft) den RCC Residential Buildings, Factory Shed, Boundary Walls aser civil constructions ajak densema lir.

Bounded:  
On the North by: Land of T C K Lotha, On the South by : Land of Joba Mech,  
On the East by: Land of Joba Mech, On the West by : Land of Joba Mech.  
DATE : 31.01.2023 AUTHORIZED Officer  
PLACE : Dimapur (State Bank of India, SARB Jorhat Branch)

**SBI State Bank of India**  
STRESSED ASSETS RECOVERY BRANCH, JORHAT  
Na-Ali, M G Road, Jorhat, Opp. ASEB Building, PIN-785001 (Assam)  
Tel No : 0376-2300193 / 2300204

[Rule - 8(1)]  
**KIOJENAGIBA NOTICE**  
Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsünglanglen sign süa aliba State Bank of India officer-i 28.02.2020 anogo nung Demand Notice ka ajanga sen apur **Shri Kupushe Sema, Proprietor of M/s. M. K. Plastic aser (1) Mr. Manan Ali, (2) Mrs. Lily Singsit (3) Mrs Gokheli Sema, Guarantor of M/ s. M. K. Plastic** nung notice agütsüba anogo nungi tenzüka anogo 60 tsüngda notice nung shia aliba ama sen 2,25,68,412.00 (Rupees Two Crore Twenty Five Lacs Sixty Eight Thousands Four Hundred Twelve only) agüjang, ta tuyua liasü.

Ajisüaka sen apuri senji magütsüet nung sen apur/Guarantor aser nürurtem dang tsünglanglen sign süa aliri iba Act kübok Section 13(4) aser Rule 8 nung agüja aliba tashi amshia 2023 kum January 31 nü tsünglanglen shia aliba kiojen agiadokogo, ta sangdonger.

Sen apur/Guarantor aser nürurtem dang iba kiojen dak sendakba nung kechia inyaksangshi masütsü metetdaksür aser kari danga tetuyuba anema inyakra State Bank of India-i sen 2,25,68,412.00 den 28.02.2020 anogo nungi tenzüka tetemlok meshitsü.

Sen apur dang iba Act nung Section 13 kübok sub-section (8) nung aliba ama mapang shidak nung item kiojen alanzüksütsü atema inyaksütsü metetdaksür.

Kiojen osang tejanga:  
**BELENSHITETBA KIOJENOSSETTSÜSET:**  
Hypothecated Plant and Machinery (I) Decker Cutting & Sealing Machine with conveyor & Servo System, 75 MM Dana Machine, Two layer Extruder Plant of 3 MM & 40 MM. Agglomerate Machine & Mixture Machine. (II) Electrical Fittings and fixtures.

**Kimong aser kiojen:**  
(1) Patta No: 95 Dag No: 2/100, Block: Chekiye, Mouza: 3, Chekiya Village, Dimapur, Nagaland nung Mr. Kupushe Sema tenüng nung aliba aser 22.12.2010 anogo nung Sale Deed No: 3167/ 10 agi ayimjemba kimong 1 Bigha den building, factory shed aser tanga constructions ajak. Boundary:- **North:** Land of Hoshito Aye, **South:** Land of Hoshito Aye, **East:** Colony Road, **West:** Land of Hoshito Aye.  
(2) Patta No: 1019, Dag No: 824/825, Village: Nagarjan, Mouza: 3, Dimapur, Nagaland nung Mrs Lily Singsit tenüng nung aliba aser 23.03.2016 anogo nung Partition Deed No: 68 A/16 agi ayimjemba kimong 2 Katha 5 lecha aser building den tanga civil constructions ajak. Boundary:- **North:** Land of Mr Thepufusetuo Meruno, **South:** Approach Road, **East:** Approach Road, **West:** Mr. Mangboi Changloi.

DATE : 31.01.2023 AUTHORIZED Officer  
PLACE : Dimapur (State Bank of India, SARB Jorhat Branch)



## TIR YIMYIM YIMOBILEM (EDITORIAL)

DIMAPUR AMUNGNÜ, TSÜKLAI (FEBRUARY) 05, 2022

### Mapa tasaktiba meshiba

**M**osa leniba kübok Egypt nungi Kanan atongtsü atema jajar nokinketerem rongnung ajak dang tasü taitba aser tamang tulutibaji Kaleb liasü ta asenoki parnok Kanan lima matong küm 40 jajaba otsütem azüngdang metetter. Item otsütem rongnung tongtibang kaji, Israel nungertem Kanan lima atongtsü anasa Paren arem nung anena alidang, kenü anogo Kibubai Mosa dang Israel nungertem alitsü asoshi agüja aliba Kanan lima ladangtsü asoshi kidong shia nungi nisung kaka yoktsü ashiba ama shimtetdang, Ebraim kidong nungi Nun jabaso Hoshea (Yihusua) aser Yihuda kidong nungi Jefunne jabao Kaleb shimtetba Züngdangba tapu 13 nung shia angur. Item itangitertemji Kanan lima ladangba nungi meyipa aludang, Kanan lima nung parnoki anguba temoatsütem ajak toktsür, Hebron nung alir aso tulu kin Anak chirtem tashi uluba indang tetsübuttsü osangang bener arua Mosa aser Aron na den Paran arem nung anenzüka alir Israel nung yimkong dang ashiba asenoki kasa Laishiba tapu nungji angur. Iba tetsübuttsü osangji angashir, Israel nung ajak tetsübu nung ola adoka ajep aser joko Mosa aser Aron anema nemnem aser Egypt-iang meyipa aotsü jembu tenzükba asenoki Züngdangba tapu 14 nung angur. Kanan limaji Tsüngremi Israel nung nem agüja lir saka tangbo ibaji aso tulu Anak chirtem ket nung lir, anungji itemji makdoker külenang Kanan limaji agitsüla. Atangji, Kanan lima ladanger arur Israel nungertem jagia Kanan limaji mamatzü aser ninang mojitsü agi sünga lir, tsükmenatsü tejep ka agi nisung ana amena atanger ta osang tajunga bener aru. Ajisüaka, parnok asoshi osang tamajungji iba limaji parnoki agidi süra yangji alir aso tulutemji makdoktsüla. Tsüngremi Israel nungertem nem Kanan agütsüba ya ayongayonga angati sempet ka agütsür ama magütsü, saka parnok tamang agi tsükchirtem alidak long jara aser mitsa nungpoka oagi rarar külenang agitsüba tenangzükba lima ka liasü. Ashiko, Israel nungertem rongnung Mosa aser Aron den Yihusua aser Kaleb na mali asübo, Israel nungertem tsükchir tsübuba agi Kanan lima metongtet, Paran arem nung jagi meyiper lila. Joko, Kanan lima alir tsükchirtemji makoktsüba osang bener aru tashi nung Mosa aser Aron nata ola maka aküm. Ibai Israel nung Egypt lima nungi Kanan atongtsüba lenmang nung atalokba tatalokbatem rongnung kanga dang tongtibang telemtetba agidak lenjem ka liasü. Idangji, Yihusua aser Kaleb nati tula shisa aser Israel nungertem dang, Anakim nungertemji tetsübu asenoki parnokji akoktsü ta ashidang, Tsüngremi parnok rongnung mapa inyakba asenoki kasa Laishiba tapu nungji angur. Iba anogo nung Yihusua aser Kaleb nati ashiba tamang aser tasü tait o jagi Israel nungertem Kanan lima tongtet. Kanan lima tonger, joko Israel nungertem tebu taren shia ali alemtsü tenzükdang, ashiko ajaki lendenlen aser tsükchir tesashi malidak tesemtemang lemezükba bilemer asütsü. Asenokia yamaji bilemstsü. Ajisüaka, shingai melemzüktsü dang, Kalebi pai tama orr Yihusua dang, Israel nung yimkongi tsübuba aser maginüba aso tulu Anak chirtem alidak Hebron tenem meshiba otsü Yihusua 14 nung angur. Küm 40 jakdang Paren arem nung pai koda tasü itta Mosa aser Aron tsüngdang jembu, kasa tasü tait tamang agi pai Anakim nung aso tulutemji akoktsü ta Yihusua dang ashiba asenoki angur. Ajisüaka, Kalebi Tsüngremi Kanan lima ajungaji parnok nem agütsüogo ta amang, anungji Anak nung aso tulutemji senzüa angur dang ashi, parnok dak tongpang nokdaktsüa tashi agienogo ta pai angateta liasü. Kaleb taküm nung jangratemtsüji pai inyakba mapa nung pai Tsüngrem ain aser tashiji metetnü. Moudang nung mesüra meinyakdang nung, kodaser kong Tsüngremi asenok ajanga mapa inyaksü (?) ta asüba tangatetbaji Kaleb dak liasü. Mapa tasak aser tsükchir tesashi alidakji dang Tsüngremer tenangzükba senmanga tuluba yuja lir ta pai amang. Iba amaji asenoka asen taküm nung tezübaba lenmang aser ayongayonga alitsüba tia dang shimtetra, asenoki kodanga Tsüngrem ain aser tashi indang memetettsü aser majangshitsü. Kaleb ama, asen mapa ajanga Tsüngrem tashi aser ain metettsüa, asenokia tangari makoktsü ta bilemba mapa tasak inyaktettsüa Tsüngrem dak amangdi.

## OLEMSABANG

### KOTAK ASER MOLUMI KONG ALI

~ Süpongnüsang Longkümer, Darogopathar Dimapur

Yakob shiba dang Israel ta ajar parnok Kanan lima nung alitang Yosefi pongmang ana pongmangba ajanga teti nungertem tenük merema Ishmael nung dang Yosef ayok, aser Kanan lima nungi Ijipi alutsüsa aküm aser küm isheka süir külen par kinunger ajak Ijip jagi alutsüsa akümba Lipok 37 :5,9,35 nung azünger. Tanapen Mosai Israel nung Kanan bushia anir adok. Yisui kinü tanur dak Herod chubai tenük merema tepsettsü bushiba ajanga Ijipi jena oa jenok. Saka tanapen Israel limai shilang, Ijip lima nungi ni kü japasu jatet Math 2 . Tetezü Temenen nungi nüji dangi anitettsü asoshi ta angatetter. Nikodima Farisi, tashitemetetter liasü aser nüjia ta bilem saka nüji masü, anungji nüji akümstsü asoshi tanapen suang ta Yisui ashi nung tambor tetsü poki koda atutsü ta asüngtangbaji tangatetter masü ta sayur Johan 3 : 4 Pa nüji asübo tanapen suang ta ashiba tetezü kechi ta asüngtangnüsüka liasü. Iba tiya tanü Aordak ataloktsü mapang tongago

Ayipba aobaji tenük amsepshi nung ataloktsü, iba mapang Tsüngrem jangzü oulaji temenenpuri mangashi temeshipur ajak penür oa adoktsü. Tetezü timtim tulu ataloktsü nungi temeshipur jatetba. Tanapenpuba aour ama arutsü, iba mapangbo tenük shiai aser pa dak atsünger ajaki angutsü JA 1: 7. Iba mapang ayipba aoba temeshipur ajak anir Yirusalemi küm meyi ka yimsü asütsü arutsü Kotak limaji Lenten metong tasazük kasa tang mile merijang ka sür noklang pungu alitsü. Iba limaji India lima dang nungi kanga agia tuluba asütsü aser iba limaji sentsüprang tapu ajak alitsü ta Lai jagi sayur. Iba yimti nungji ni tenlaki kecha mangu; kechiyong ajak takoksang Tsüngrem aser Sanchanuji iba tenlakiji lir JA21: 15-Kümtetdakba Yisui den temeshibur arunü nungi temeshi tanüla mapa ajak anentsü. JA 21: 15-22 Kotakji ibai alitsü aser molumiji Tsüngremi iba lima nungsa renemaa alitsü ta angatetter. tongmelang agi angatetta atati.

Meimchiri sentong aika atongtangaka mapang agi donga arur ta tamang agi angatettsü sarasatemti. Kechaser Yisui tasürtem shia arudaktsü, Tsüngtsüker aser nükpoker aneptsü saka meimchir mulungjangi aji mai kangki nung angenlok. Anungji Tsüngrem metetteri mapa tamajung nungi pilats, saka tera amangertem mangatettsü. Mark 9: 38 Yohani Yisui dang ashi, "Tesayur, nisung kati nü tenüng nung temenen tanüla aridoktsüba onoki angu, aser onoki pa nemtem, kechaser pai onok sülen manidaksaka Yisui ashi, pa tenemtem, kechaser kü tenüng nung sayatenya inyakeri ano yakta ni majung indang tesülen jembitsüakok." Kachiaser political partiji teti atema masü saka pa/La khen atema position yanglur ta langzüksü lenmang aika lir. Reginal parti yanglutetta bei lima yanglutsü tang aliba nüpur tekolok aser shisatsüi marur, taoba yimsüsürtemipo külem telok nung temulung majemra yakta parti tasen poratetta melenshir takok ngua yimsü süa aruogo. Saka tang nüpurtem aser yimsüsütsü jangrartemji tenük tapok mulungjanga ta 27.1. 2023 Rev Dr Meyu changkiri züluba ocet agi kuli agütsür. Shiba yimsüsüba mapang Naga lima teküpoktiba tiyai idaktsü jangjaja metettaogo iba yimsüsür Tsüngremi songtemang ta sarasatemti. Kechaser temeneni yimsüsüba nung nüpurtem asüktemer ta Tsüngrem oui ashir. Tanü BJP parti I kechi inyaker mangatette Khristan lima nung, tongtipangsa Ao kin yimsüsütsü menden raktepba yagi khristan yimsü aniokba mezüngmeshir ta mangatetter. Anungji amangpabur ajaki ya nokdangtsü sarasatemtsü nungdaker. India nung Hindu tesashi alidak Delhi nung khristan kanga ishika tasü ita longkak aitba osang angashiogo, sürapang asenokbo koda ? Temenen aniokba mesasae khristan lima raksatsütsü merangertem anema amangpabur ajaki metsüpue Tsüngrem tang sarasatemtsü kanga nungdaker. 1977,78 Moraji Desai Bjp yimsüsüba mapang India lima amangpabur ajaki sarasatema among dang Tergaon Jorhat anasa Jobber nungi tsük aser pa meyiba aotangpo par parti yimsüsüba raksar liasü. Anungji Naga lima raksatsü jangrartem dak Tsüngremi tangatetba agüjang ta sarasatemtsü kanga nungdaka kümaogo ta ayongzükker. Tanü mapang ya tamang tongpang tesashi lir.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

Pope Francis-i South Sudan nung rara ajanga prokshia alirtem ajuru



January 04, 2020 nü Pope Francis aser Archbishop of Canterbury, Justin Welby nati South Sudan nung lenirtem den jembidang tangokba noksa nung angur.

**February 04, 2023:** Pope Francis, Archbishop of Canterbury, Justin Welby aser Church of Scotland Moderator nungeri South Sudan nung rara ajanga linük tesem balala nung prokshia alirtem ajuru jembidago.

Khristan lenir aseme yimjung atema Congo aser South Sudan na semdanger.

Khristan yimsü puti otsü nung tang mezüng Roman Catholic, Anglican aser Reformed traditions nungi tongti lenirtemi longjemer tang mezüng rara aliba linüktem semdanger.

South Sudan ya tang alima nung linük tasentiba lir. 2011 küm Sudan nungi South Sudan linük tenteta liasü saka 2013 küm nungi tenzüka lisopur telok balala

tsüngda raraba ajanga mapang talangka (2018 tashi) civil war liasü.

2018 küm yimjung tezüngzüktep ka agiba ajanga civil war anen saka maneni telok balala tsüngda raraba ajanga nisung aika tesem balala nung jenshia lir.

Nütsüng million 11.6 aliba South Sudan linük nung nisung million 2.2 shji jenshia lir aser million 2.3 shi tanga linüktemi jena oa refugees kümogo, ta United Nations-i metetdaksü.

Iba linük nung kanga sensak tia nung alir nütsüng aika lir aser nütsüng shilem asemü nungi shilem anatibo teyari balala nungdaker.

South Sudan ya Khristan nütsüng teimba aliba linük lir. Hokolbarnü Pope

Francis linük yimtiba, Juba tonga aruba mapang nung nisung meyirjang aika lenmang nung adenshir asem atemba den külemi ken tena pa agizüka liasü.

South Sudan Tir, Salva Kiir aser tatong Tir, Riek Machar na densema lenirtem den jembidang Pope Francis-i rara anema nokdaksü, tesempa aser ochimashi anema raratsü ayongzük.

"Joko yamai meinyaktsüla. Joko azü metokshitsüla, joko meraratsüla aser kati ka nem tai tongloksütepba ya anentsüla," ta pai ayongzük.

Kasa sentong nung South Sudan Tir, Kiir-ia, par sorkari South Sudan nung yimjung atema inyaktsü, ta metetdaksü.

ANOGO ABEN TSÜNGREM DEN

SÜNGJEMA ATAANG

"Kibuba asoshi ataang: Tashi itang aser ne mulung tasü itdakjang: Au, Kibuba asoshi ataang"

~T. Ken 27:14


Tsüngrem ni süngiendakjang, kü mulungjang tok-tokba ya nai azüokjang, Kü shisabulu aser khuret-temya pongbadakjang. Oak süngdongi tera ali telungi tanemi jungjunga aiba ajanga tashi tait tebur tajung süngdong tulu akümba ama, nia tesüngjem nung atasa nai meimchir nem agütsüba jenjang nung tera yangdakjang.

Asenoki atatsüba ya angazüktsüla. Asenoki kechi inyaktsü mejangjara mesüra memetetra süngjema atatsüla.

Asenok taküm ka nung aritepba tanela ya azüoktsüla kechiba süra aritepba tanela jagi aiben asen takümüji lendongi yoker.

Anungji shibai Tsüngrem tanelaji angateta atadir pa/la asoshi taochi teperi agütsür. T.Ken 130:5 nung ashir, "Kibuba asoshi ni atar, kü nelai atar..." Ataba ya taküm nung tazüokba alitsüba nung shilem tulu ka lir. Tsüngremi aiben matatetba nisungtem dang atatettsüla lesson sayur. Ataba nükjidong 4 lir: Taremzüka tamangji tajungba inyakdaksür, Tarutsü aliba sempet asoshi renemshitsüba mapang agütsür, Temoatsü atangji tanangba südaktsür, Tsüngremer tematibaji sayur.

Hong Kong nung Khristantemi missionary Thomas nem akhüm agütsü



Missionary Thomas Murphy

Joseph Ha Chi-shing na densema Columban missionary aser putir 25 shi aden.

Asüpila sentong agiba sülen tasü mangji tayimtsü ajanga Ireland-i bener ao.

Bishop Chow-i sangdong ka ajanga, "Putir Chen Fa-yi (Thomas Murphy nem jaloktsüba tenüng) asüba ya Arogo atema aser Asia nung pa ajuru alir Khristantem ajak atema takoksa tulu," ta metetdaksü.

"Pai maneni asenok onoki nungita yaritsü aser Kodak yimli nungi asenok atema maneni sarasademtsütsü, ta asenoki amanger. Pa tatem maka tepela nung Kibuba kabu nung alitsü sarasademtsür," ta paisa lemsatep.

Thomas Murphy ya 1949 küm August 3 nü Castlebar, Ireland nung aso aser April 14, 1974 nung ordain süa liasü.

Pa 1974 nungi 1978 tashi South Korea nung inyakba sülen Taiwan Mission Unit ta ajaba missionary telok nung aden aser Taiwan-i oa liasü. Pai Taiwan nung tanurtem atema daycare center ka amenoktsü aser mission mapa balala inyaka aruogo. Pa Federation of Asian Bishops Conferences (FABC) nunga küm aika Executive Secretary inyaka liasü.

**February 04, 2023:** Hong Kong nung Khristantem longjemer Irish-Columbian missionary, Thomas Murphy asüpila sentong nung dena pa nem akhüm agütsüogo.

Thomas Murphy-i Korea, Taiwan, Hong Kong aser China densema Asia tesem balala nung küm aika Khristantem tenzüka aruogo.

Missionary Murphy January 8, 2023 nü Hong Kong nung aliba Columban House nung asü aser pa den tatembangbuba asüpila sentongji January 28, 2023 nü Hong Kong nung aliba St. Joseph Arogo Tenla kidang agi; pa arrshi küm 74 liasü.

Hong Kong nung Jesuit Bishop, Stephen Chow Sau Yan-i ketdangsüa asüpila sentongji agi. Iba sentong nungji taoba mapang Hong Kong nung Bishop, Cardinal John Tong Hon aser Auxiliary Bishop

China ya amokmeren linük ka lir: International Religious Freedom

**February 04, 2023:** Anogo ishika tejaklen Washington D.C nung 2023 International Religious Freedom (IRF) senden nung alima nung lenirtem, Khristan lenirtem aser meimchir temeden atema inyaker meyirjang aika adenshia alima tesem balala nung yimsü nung ajemdaker reshikangshiba tebilemtsü onük jembidago.

Parnokisa alima tesem ajaklen yimsü dak sendakba temeden ajungkettsütsü atema jembidago.

Yaküm alima tesem balala nung mepetmesü aser reshikangshi jenjang tamajungba akümba dak sendakba nung IRF senden ayongzükertemi, tamangba yimsü temeden ya meimchir temeden ka dang masü saka iba ya foreign policy indang tongtibang onük ka lir, ta metetdaksü.

IRF senden tetenzük sentong nung jembidang Republican, Mike McCaul-i, "United States-i maneni alima nung reshikangshi ajanga takoksa angurtem atema ola adoktsüla," ta

ashi.

Rep. Jim McGovern-i, "Nisung tapu balala aika aliba lima ka nung nisung ajak nem tamangba yimsü temeden magütsüra iba temedenji shinga nem-a magütsü den kasa," ta ashi.

Paisa, "Tamangba yimsü temeden anema inyakba linüktemji reprangdangra nüburtemi sorkar anema nokdakba linük aser sorkar tashi itta maliba linüktem lir," ta ashi.

McCaul-i, "Tamangba yimsü temeden kümzükbaji teinyaktsü tim ka inyakba dang masü saka iba ya linük security onük ka lir. Rara anendaktsüba ajanga linük nung dang masü saka bendanglena kiralongra nokdangtettsü. Tamangba yimsü temeden jenjang tajungba kümra rara ajema akümtsü," ta metetdaksü.

Taoba mapang IRF atema Ambassador-at-Large, Sam Brownback, tang alima nung tatalokbatem tongti kuliji iba tebilemtsü onük ajanga lir, ta ashi.

Paisa, "Tang Ukraine ya reprangdangang. Ukraine

nungertemi Russian Orthodox Church nungi Ukrainian Orthodox Church pilar," ta ashi.

Brownback-i, "Alima nung tamangba yimsü temeden tsütsü China linük ya amokmeren tulutiba lir. Parnoki tashi tali amshia yimsüsür aser parnok inyakyim benshidaktsü atema parnok indang technology amshia ibaji inyaker," ta ashi.

Citizens Power Initiatives for China nungi Dr. Yang Jianli-ia China Communist Party (CCP) nem tai tonglokja, "China-i tamangba yimsü kecha magizüktetbaji CCP-i nisungtem nem Party külemdaktsünüba agi lir," ta ashi.

China-i Uyghur Muslim nungertem, Tibet nungertem aser tanga yimsü amangertem anema inyaker aser CCP kübok malirtem ajak samatsütsü meranger, ta shia Dr. Jianli-i alima linüktem dang, alima linüktemi longjemer Russia Tir, Putin aitsüba ama China-a aitsütsüla, ta ayongzük.

AO OSHI ANGAZÜKDAK: TANÜ ANGAZÜKTSÜBA OJANG



Oset

(n) nungdaka amshibatem (things, articles)
\* Kibong tasen nung ki oset aika nungdaker.

Osetjenri

(n) akhidang amshiba osettsüset ayudak (museum)
\* Asen lima nung osetjenri aikabo mali.

OLONG PAITEP # 6419

15x15 crossword puzzle grid with numbers 1-19 indicating starting points for words.

TIPLÉN

- 2. Teburtemi tejak nung awaba - (8)
6. T \_ \_ \_ em - (3)
8. Tzük ayudak - (3)
9. Nungdakba dang timba - (6)
11. Zuina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanüdangtsü - (4)

OLONG PAITEP # 6418 TELANGZÜBA

TIPLÉN :

- 3. Tema, 5. Tawa, 7. Arok, 8. Jaja, 9. Ati, 10. Oru, 13. Ani, 14. Asangsang, 15. Asü, 16. Tamang, 18. Asa, 20. Ayok, 21. Moat, 23. Yiru, 24. Emok.

LANGTSÜNGLEN :

- 1. Tar, 2. Wako, 3. Taju, 4. Mejang, 5. Taa, 6. Waitsü, 11. Rasa, 12. Anem, 13. Angati, 14. Asüyim, 16. Akok, 17. Amen, 19. Alu, 22. Aya.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiriyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....

NEDA chairman Sarma-i Agartala nung BJP atema nüboyimtsü TIPRA Motha chairman Pradyot-i Assam CM aitsü

Agartala, February 4, 2023 (Agencies): February 4, 2023 nü NEDA chairman aser Assam chief minister Himanta Biswa Sarma-i Agartala nung kilen shia semdanga BJP atema nüboyimtsüogo.



Motha chairman Pradyot

79 Tilla constituency nung BJP candidate Papia Datta atema pai nüboyimtsü.

February 3 nü Sarma-isa Tripura nung lokti sentong asem nung o jembia liasü.

Tripura nung alirtemi amajok nung TIPRA Motha nem vote meinoktsütsüla kechiyong parnoki sorkar aküimtsü makok ta pai ashi.

Krishnapur Assembly Constituency nung BJP candidate aser BJP Janajati Morcha state president Bikas Debbarma atema nüboyimtsüba sentong nung Sarma-i iba ya ashi.

"Tipra Motha-i menden kar nung takok angutsü akok saka parnoki sorkar aküimtsü makok. Parnok Delhi nung ali. Parnok Tripura mesüra Centre nung maliser kodaser parnoki nübertem atema inyaksü?" ta paisa asüngdang.

Assam nung Bharatiya Janata Party (BJP) den

yariteper Asom Gana Parishad (AGP) samaogo ta TIPRA Motha tanishir Pradyot Bikram Manikya Debbarma-i ashi.

TIPRA Motha-i sorkar aküimtsü makok ta jembiba o meyiptsüdag Pradyot-i iba olen jembia liasü.

"Nisung ajak indang tebilemba lir saka khen mapang ka Assam nungeri BJP nem vote enoktsübaji amajok aser AJP ya party tuluba ta ashiba ni NEDA chairman dang nenshir" ta Pradyot-i ashi.

"Party kecha tulu mesüra tila ta mezüngshitsüla aser Tripuri nung votes ji nübertem temeten lir. Triprasa nungeri parnok asoshi jembitsürtem nem dang vote enoktsütsü" ta paisa ashi.

1984 nung BJP MP 2 dang liasü saka tanübo MP 300 tema lir, ta Pradyot-isa tatishitsü ka bener arua jembia.

NPP-i Meghalaya assembly elections atema manifesto sayaogo

Shillong, February 4, 2023 (Agencies): Meghalaya nung National People's Party (NPP)-i assembly elections atema manifesto sayaogo.

Ampareen Lyngdoh aser Meghalaya nung NPP lenirtem aden.

NPP indang Meghalaya election manifesto ji "People's Document - Vision 2023-28" ta ajar aser NPP national president & chief minister Conrad Sangma-i sayatsü.

NPP-i lanurtem asoshi mapa lakh 5 adokdatsütsü aser Urban o Rural tesemtem nung entrepreneurship, tourism, agro-processing & knowledge/digital sectors mapa inyaksü nangzüka lir.

NPP election manifesto ajanga Meghalaya nunger asoshi 2023-28 alizüngtem shia lir. Iba nung Meghalaya nunger lanurtem nem mapa inyaksü maongkatem aser aluyimer o yimtsüngtem yaritsü shia lir.

NPP-isa lanurtem nem world class sports facilities agütsütsü aser iba nung stadiums, trainings, talent identification aser scholarships dena lir.

NPP manifesto nungsa 'Promises Delivered' ta ser sorkari inyaktetbatem shia lir.

NPP-isa yimtsüng shia nung sorkar services agütsütsü atema Chief Minister's Facilitation Centers 1000 lapoktsü sentong lir. Parnokisa Village Community Facilitators (VCFs) indang züngsem tenzüksünür.

NPP manifesto sayaba sentong nung Meghalaya deputy chief minister Prestone Tynsong, cabinet minister Sniawbhalang Dhar, Raliang MLA Comingone Ymbon, Jowai MLA Wailadmiki Shylla, NPP East Shillong candidate

Aluyimertem nem FOCUS aser FOCUS+ ajanga maneni teyari agütsütsü aser iba sentong ya kilen ajak ayimjemtsü.

NPP-isa yimtsüng shia all-weather roads aser RCC/Steel Bridges ajanga sendakteptsü aser iba atema village-by-village plan ka sayaogo.

Iba sentong atema "Chief Minister's Village Connectivity Scheme" ta ser tenzüksü tebilemba lir.

NPP-isa Key Infrastructures aser Facilities renloktsü indang shia lir aser yimtsüng ajak dangi air connectivity aser internet agütsütsü nangzüko.

Meghalaya nung Health Sector maparen nung temelenshi tulu bener aruogo aser maneni health infrastructures tajungba anepalutsü aser tanur o tetsü aser health insurance schemes nung temulung agütsütsü ta NPP-isa nangzüko.

Iba wadang atema NPP-i Chief Minister's Affordable Drug Centers ta ser Meghalaya nung jenjang dalang agi mozü ayoktsü.

Assam nung tanur kibong akümba anema inyaker; Putir 52 apu

Guwahati, February 4, 2023 (Agencies): Assam police-i tesem balala nung tanurtem kibong kümdaktsüba maparen anema inyaka aodang putir (qazis) 52 tashi puogo.

i metetdaksüogo.

Sarma-i ashi.

Honibar tashi nung Assam Police-i nisung 2170 tashi apu aser parnok ya tanur kibong kümdaktsüba maparen dak sendakba nung apuba lir.

Hokolbar nungi Assam Police-i nisungtem aputsü tenzüker aser parnok teimba ka tanur kinungbotem lir. Tesüiba hopta ka tsüngda Assam nung child marriage anema ken o 4004 benoka lir.

1929 Prohibition of Child Marriage Act ajanga arishi küm 14 ser teküpok tanur tetsürtem aser arishi küm 18 ser teküpok tanur teburtem kiyimtsü noktanger.

Assam nung Prohibition of Child Marriage Act alema inyakerkem apur, ta Assam chief minister Himanta Biswa Sarma-

"Assam sorkari state nung child marriage khuret samatsütsü bangjema lir. Tang tashi nung Assam police-i ken o 4004 benokogo aser tarutsü anogotem police-i mapa tuluba inyaka aotsü" ta Assam CM

Iba Act ya 1978 nung yanglushi aser tetsürtem arishi küm tasazük 18 aser teburtem 21 melenshia liasü.

Maneni, Prohibition of Child Marriage Act, 2006 ajanga 1929 Act melen saka arishi küm tasazük kasa dang lateta lir.

Sunny Leone'er fashion show tesem anasa bomb ka apok

Imphal, February 4, 2023 (Agencies): Manipur yimtiba Imphal nung Bollywood actor Sunny Leone-ia shilem agia fashion show ka agitsü sentong lir saka iba tesem anasa bomb tuluka apok.

Sunny Leone'er fashion show alitsüba tesema anasa Honibarnü bomb ka apok.

bomb ji fashion show alitsüba tesem nungi metre 100 shi pilar apok saka iba lendong nung nisung yiruyibong maliasü. Iba tatalokba atema telungpur telok shingiaia tenüng agiba osang metetdaksü lir.

Sunny Leone-i Deobarnü Imphal nung fashion show nung shilem agitsü sentong lir. Honibarne 6:30 ako meta

# Myanmar military-i ano tesem kar nung martial law benok

**Yangon, Tsüklai/February 4 (Agencies):** Myanmar nung military sorkari military anemertem kanga tashi ita aliba tesemtem nung martial law benokogo aser iba ozüing kübok nüburtem linük ashiochtsüba nungi tenzüker osang teyazü prokshiba ajak atema military-i obendangtsü.

Iba ozüing benokba ya state meyong media-i Hokolbarnü sangdong aser iba ajanga jila 37 dak kongshitsü. Iba ozüing kübok tasüba agi merenshitsü atema obendang agütsüba dak alaker military tribunals-i obendang agütsüba atema tanaben mepeshitsü asoshi memelatsü. Tasüba agi temerenshi agütsüba ya military chief Senior General Min Aung Hlaing-i agizüksüla, ta Myanmar osang kaket Global New Light sangdong ka ajanga metetdaksü.

Küm ana tejakdang sorkar atsüingtokba sülen nüburtemi prangbong hadir balala bener military anema rara tenzüker aser tang iba jenjang agiba ya item teloktem tashi ita aliba tesemtem aziüoktsü atema ta angateter.

Martial law atsülangshiba ya security tali tajungba aziüoktsü aser temzüing ozüing shidak benoka inyaksangshiba den nüburtem yimjung aser tesunep nung toktsütsü atema lir, ta Global New Light of Myanmar-i ashi.

Iba temzüing ozüing tesashi kübok military tribunals-i, linük ashiochtsüba nungi tenzüka osang teyazü prokshiba atema obendangtsü, koba military-i osangbenertem aika tepuokdaki yoktsü atema amshiatokogo.

Martial law agi kongshiba jila 37 ya Sagaing, Chin, Magway, Bago, Mon, Karen, Taninthayi aser Kayah state kübok lir.

Martial law küboki aitba tesem tasentem nung ya military aser anti-coup People's Defence Force aiben mangatetep adoka arudar. Iba telok ya opposition-i amenoker aliba underground National Unity Government indang armed wing lir.

Linük nung yimti tongtibangtiba aser commercial hub Yangon kübok jila ti aser Mandalay yimti kübok jila pongu tashi nung kasa ozüing benoker liasü.

Bodhbarnü military sorkari state of emergency benoker aliba atsülangshiba sangdonga liasü, koba parnoki küm ana tejakda sorkar atsüingba mapang benoka liasü. Iba ajanga August ita general election agitsü imla aliba nung tetsükdaksü adokdaksüogo.

Military-i ashiba agi, linük nung tensa mejungi lir anungji election yimjung nung agitsü atema renemshitsü asoshi emergency ya ano ita trok tashi benoktsü nungdaka liasü.

Germany indang foreign ministry-i, martial law tesem timba nung benokba aser state of emergency atsülangshiba ya ozüing alema jenjang agiba lir, ta ashiba den military dang azütokshi aser meimchir temeden anema inyaksangshiba anentsü ayongzüko.

February 1, 2021 nü sorkar atsüingba sülen yimjung nung longkak aita alirtemi prangbong

hadir bener sorkar den rara tenzüker aser tang Myanmar military-i parnok yimsüsüba anema nokdakertem maziüokteti arudar.

Assistance Association for Political Prisoners-i ashiba agi, nüburtemi shimba lenir Aung San Suu Kyi atsüingtoka military sorkar amenokba sülen tang tashi nung civilian 2,948 shi tepsetogo. Iba telok yagi nisung tepsetba aser apubatem asadanga alir.

National Unity Government otongdar kati Associated Press news agency dang ashiba agi, linük süngjemshidaksütsüba dak atemer military-i nisung timba tepsettsü aser rishi kangshi taliba akümtsü.

"Onoki junta kümzüka ayuba sepai aser police tem dang nüburtemi meyiper raraba maoktsüba rara ka ojang dang shilem agiang ta shiner," ta otongdar Nay Phone-i ashi.

Military sangdong balaka ajanga ashiba agi, item tesemtem nung administrative aser judicial mapa ajak regional military commanders lenisüba nung inyaksangshitsü, shibai aibelen 23 atema military tribunals amenoktetsü aser temerenshitem rongnung tasüba agi merenshitsüba aser mapang telatet ka makai tepuokdak ayutsüba densema lir.

Kasa mapang nung Min Aung Hlaing-i, linük kübok jilatem asemsü nung ka dak tali military-i maziüokteti lir, ta ashiba state media sangdong ka ajanga Bodhbarnü metetdakja liasü.

# US-i Ukraine nem long-range missiles agütsütsü

**Washington, Tsüklai/February 4 (Agencies):** US-i ashiba agi, Ukraine nem USD billion 2.2 alang military teyari agütsütsü aliba nung long-range missiles densema lir aser iba ajanga attack range anaben agi timba kümdaksütsü.

Tang teyari agütsütsü aliba densema US-i Ukraine nem 2022 küm February ita nungi tang tashi nung USD billion 29.3 agütsüogo.

Hadir balala agütsütsü aliba rongnung ground-launched small-diameter bombs (GLSDB) densema lir aser iba yagi km 150 shi pilar aliba target tem nunga kashitsü.

Ajisüak, item injangtem ya Russia-i atsünger aliba Crimea tesem kar amaktsü atema amshitsü akok ta ashiba dak sendakba nung ketdangstütemi kecha telangzüba magütsü.

"Ukraine indang operaton sentong tem dak sendakba nung telemtetba ajak parnoki dang agir," ta Pentagon otongdar Brig Gen Pat Ryder-i osangbenertem dang ashi.

"Iba ajanga parnok nem longer-range capability, long-range fires capability agütsütsü aser par linük kümzüka ayutsü

atema aser Russia-i atsünger aliba tesemtem meyipa agitsü asoshi teyari agütsütsü," ta paisa ashi.

Russia-i 2014 küm Crimean Peninsula ya ozüing alema atsünga liasü. Ajisüaka iba tesem ya tawa Ukraine nung sepaitemi maka arudar.

Anüolen aliba linüktemi Ukraine nem fighter jets amala tangar amaktsü asoshi hadirtem magütsür ta shia arudar.

Tweet ka ajanga Ukraine tir Volodymyr Zelensky-i teyari talila agütsüba atema US aser tir Joe Biden dang kanga pelaba lemsatapa liasü.

"Onok indang hadirtemi komaka talangba khatetdir yamaji onok sepaitem tali arakzütetsü aser Russia nung takaratiba nung nokdangtetsü. US den külemi onoki kiralongrar anema nokdaker," ta Zelensky-i ashi.

Tir Zelensky-i anüolen aliba linüktem dang talang nung aliba target tem dak khatetsüsa par sepaitem nem artillery agütsütsü mepeshia aruogo.

Ukraine indang longest range weapon ya Himars rocket system liasü aser iba yagi km 80 shi pilar aliba target tem nung khateta liasü.

GLSDB ajanga Ukraine nung sepaitem nem Russia-i amokbanger aliba Donbas, Zaporizhzhia aser Kherson tesem kübok parnoki khaloktsünüba tesem mashi ka nung khatetsü. Iba ajangasa anütoklen Russia nung indang supply line tem amokmerentetsü.

GLSDB ya Boeing and Saab-i yangluba lir. Iba ya gliding rocket ka lir kong bomb tila ka sendakloka lir aser iba yagi meter ka tashi pilar aliba target tem nunga khatetsü.

GLSDB ya Ukraine nung tang amshia aliba Himars aser M270 MLRS system densema weapons system balala nungi khateter. Ajisüaka Pentagon aser Boeing napronglai missile ya kodang agütsütsü iba indang osang kecha magütsü. Iba missile ya Ukraine atongtsü atema ita teku tashi agitsü akok, ta osang balala ajanga metetdaksüogo.

Package tasenbuba nung Himars missiles talila, Javelin anti-armor systems 250 densema lir. Anüolen aliba linüktemi Ukraine nem teyari agütsütsü kanga menor ta ashiba mapang ka nung tang iba osang sangdongogo.

## Tepela Tasoba Anogo (05.02.1943)

I. Shilu Jamir

Tsüngremi obala küm 80 tashi anema moatsüba yutsüba asoshi Pa nung asanger. Ano maneni asen tsürabur taküm anema arishi talang moajangma ta onok sarasadem.

~ Temeim Chirnur, Semchir aser Kinungertem.



## OJALA KÜM 100 AJUNGER



Wt. Temjeninla (Chuchuyimlang)

Temeim Ojala küm 100 tashi arishi moatsü nung tulusang Tsüngrem tenüing asanger. Laishibai ashir, "Mendi tashi kümerang asükba medem, na tambur kümerang lepi aitsü," Yob 5:26. Tsüngremi ano ojala nem arishi sükklojangma, aji ozü sarasadem.

- Temeim kinungertem.

### OFFICE OF THE VILLAGE COUNCIL LAKHUNI

P.O. : Mangkolemba, B.P.O - Alongtaki

Ref.....

Date 22/11/2022

26 June 2017 Mr. Nokzangluba Lakhuni yimten nungi jentoka aliba, tanaben pai Yimten bushia aru nung 22 Nov. 2022 pa yimten nung anioker.

Tekatemsu  
Chairman,

Moatemjen  
Secretary,

Lakhuni Village Council

## AYIMOKTSÜR


27th Mokochung Town Assembly Constituency nung alir Longsa senso nübur ajak longjemer tang aruya aliba 14th Nagaland Legislative Assembly election nungji ozü lenir Wb. Metsübo Jamir, RD Minister, taküm bendanga yaritsü lemtetba alima dang sandonger.

27 Mkg Town A/C Longsa senso tenüing nung;

Sd/-

Jungmalemba  
Alemyungba

Noklenrenba  
Tongpangkokba



Hokolbar aonung US kübok Ohio aser Pennsylvania na arrtsü anasa train ka tsükoka iba tesem nung mi tulu adoka liasü. Local media sangdong balala ajanga ashiba agi, emergency crew temi iba tesem nung alirtem anina liasü.

## Frolic Cup: MVYO, Amigos & Fury FC-i takok angu



Amigos nungi asayar Kekhrie, Sirhima FC nungi asayatem den ball raktepba noksa nung angur

**Dimapur, Tsüklai/February 4 (TYO):** Frolic Club-i ayongzüka Medziphema jila nung tang asaya aliba Frolic Cup nung Honibarnü mezüngbuba asaya Medziphema Village Youth Organization-i goal 3-1 agi Chester United madak takok nguogo.

Asaya mezüngbuba shilem telok ana tsüngda kanga toktepa asaya aser MVYO nungi Ketoho-i minute 31buba nung mezüngbuba goal idaktsü, ajisüaka Chester atema Kevisekho-i minute 35buba nung goal ka idakja goal kasasa aküm.

Asaya tanabuba shilembo MVYO-i amokbanger asaya aser parnok rongnungi Menuoneikho-i minute 50buba nung tanabuba goal idaktsü aser

asaya atemtsü lia Thejasehuo-i MVYO atema tasembuba goal idakja parnoki asaya akok.

Honibarnüsa mezüngbuba quarter final asaya Amigos FC aser Sirhima FC na asaya aser iba asaya ya Amigos FC-i koka parnok semifinal-i iogo.

Asaya tetenzük nungi Amigos puri amokbanger asaya aser goal 5-1 agi Sirhima tsükdakja liasü. Amigos atema Kekhrie (16th minute), Kakhevi (30th minute) Toka (34th minute), Menguzelie (44th minute) aser Rhitso (49th minute) nungeri goal kaka idakja liasü.

Sirhima FC atema goal ka ya Thanghao-i minute 42buba nung idakja liasü.

Quarter Final asaya tanabuba Fury FC-i kokogo.

Parnoki goal 5-1 agi VFA FC madak takok ngua liasü. Asaya nung goal aika idakja asayaogo aser kasa mapang nung goal idaktsütsü maongka anguba dena aika magiteti liasü.

Fury FC atema Jangmilen (15minute) Temjenwati (28minute) Thülünso (54 & 57 minute) aser Hailaujibe (68minute) nungeri goal idaktsü aser VFA atema Puleka-i minute 44buba nung goal ka idakja liasü.

**Hombarnü asayatem yamai alitsü:**

3rd Quarter Final :01:00 pm

United Falcon Club Vs. Ton FC Molvom

4th Quarter Final 02:30 pm  
Medziphema Village Youth Org. Vs Winfield FC

## IBA world ranking nung India 3bubai tuogo

**New Delhi, Tsüklai/February 4 (Agencies):** Boxing asaya nung India nungertemi maneni kanga junga asaya tawa sayaba International Boxing Association's (IBA) world ranking nung India team tasembuba jenjangi tuogo.

Boxing Federation of India's (BFI)-i asayatem mezüng südaktsür jenjang tapet agiba aser asayatem kanga junga asayaba sülen parnoki ranking points 36300 nguogo aser India team ya Kazakhstan (48100) aser Uzbekistan (37600) na sülen tasembuba jenjang nung lir.

India team-i boxing asaya nung takok tajung ngua aoba linük USA aser Cuba nata ajatetogo. USA tang pezübuba aser Cuba tekububa nung lir.

"India, BFI, boxer tem aser fan tem atema iba ya alizüng tasen ka tongtetba lir. Küm ishika tejakdang 44buba nung aliba tang tasembuba jenjang tongteta India nung boxing asaya kanga renlokogo. BFI-i India ya boxing powerhouse ka kümdaktsütsü nükjidong yur inyaka arudar aser jenjang ajak nung asayatem nem facility tajungtiba agütsüba den state aser national asayamung balala ayongzüka asayadaktsür aser



bendanglenia anir oa asayadakja parnok ajungkettsü meranger. Iba ranking ajanga India nung boxing asaya kanga kara renloka aoba aser alima nung jenjang tajung ka nung aliba sayur, koba taoba küm ishika tsüngda rangloker inyaka ajangzüktetogo," ta Boxing Federation of India tir Ajay Singh-i ashi.

Küm ishika tsüngda India nung boxing asaya kanga kara renlokaogo aser India team World Championships, Asian Games aser Commonwealth Games amala global multi-nation asayamungtem nung top 5 nungbosa alir. Taoba CWG asayamung ana nung India nung boxer temi medal 16 kokogo aser international asayamung balala nung India nung boxer temi 2008 küm nungi tang tashi nung medal 140 nguogo.

2016 küm nungi tang tashi nung India nung boxer temi tebur aser tetsür category nung Elite World Championships medal 16 nguogo. Kasa mapang nung BFI-ia linük nung international asayamung tongtibang aika ayongzüka asayaogo aser March 15 nungi 26 tashi tang agi tasembenbuba India nung Women's World Boxing Championships ayongzüka asayatsü.

"International asayamung tululu ayongzüka agiba ajanga iba asaya domestic jenjang nung renloka aotsü ajungmesor aser lanurtem iba asaya asayatsü ajungmesor. 2017 küm Guwahati nung Youth Women's World Boxing Championships aser 2018 küm New Delhi nung Elite Women's World Boxing Championships ayongzüka asayaba ajanga alimai-i India nung asayamung ayongzüka asayatsüsa tashi aliba nguogo aser tang World Elite Women Championships ayongzüka asayatsü renema lir," ta tir-isa ashi.

Taoba Youth World Championships ana nung India nung junior aser youth level boxer temi medal 22 anguba ajanga India nung boxing asaya tarutsü tajung aliba sayur.

## Perth Scorchers-i BBL final nung Brisbane Heat akok

**Perth, Tsüklai/February 4 (TYO):** Honibarnü Perth Stadium nung Big Bash League (BBL) final asaya nung Perth Scorchers nungi arishi küm 19 asayar Cooper Connolly-i out mesüi run 25 yanglua par team-i asaya wicket pongu agi akokba nung teryari agüja liasü.

Mezüng batting amenba sülen Heat puri over 20 nung wicket 7 out ser run 175 yanglua liasü, ajisüaka Scorchers puri parnoki yanglur aliba run ya asayar pongu aser ball pezü anunga lia menepatok.

Asaya akoktsü atema ball 19 nung run 39 nungdaka lia Connolly batting ameni ait aser pai tetenzük nungi kanga junga asaya-a six ana aser four ka azük.

Tatembangbuba over nung asaya akoktsü atema run 10 nungdaka aliba mapang Heat nungi bowler Michael Neser-i aonba ball Nick Hobson-i (18 not out) boundary ana tashi züka asaya akok.

Run arishiba mapang Scorchers puri meyilongi tenzük aser azümesena asemba mapang Stephen Eskinazi (21) run out asü.

Heat nungi bowler temi mezüngbuba over ter kanga junga aon aser parnoki asayar

3 out sütsür run 67 dang agüja liasü.

Captain Ashton Turner-i boundary pongu aser six ana züka par team tejakdangi ani aser pa nem Josh Inglis (26)-i teryari agüja liasü.

Run 53 yanglur aliba mapang Turner out asü aser iba sülen Connolly aser Hobson nati kanga junga asaya par team takok dangi ani.

Asaya mezüngbuba shilem nung heat opener Josh Brown-i kanga junga asaya tenzük aser mezüngbuba over nung run 25 yanglu, ajisüaka pa out süadok. Iba sülen Sam Heazlett (34) aser Nathan McSweeney (41) nati team jenjang yanglushi.

Over 13buba nung batting powerplay agia takok tashi run yanglutsü merangba mapang Heazlett aser skipper Jimmy Peirson (3) naprongla Jason Behrendorff-i (2-26) out süja liasü.

Maneni ball 14 nung run 31 yangluba sülen Max Bryant-a out asü aser ball ka dang lir Neser golden duck achi.

Team anaprongla nungi asayatem yiruba aser linük tenüng nungi asayatsü atema asayatem aninba ajanga nungtugu asayatem aikati shilem magitet.

## Dipa Karmakar nem ita 21 tenokdangba agütsü

**Tsüklai/February 4, 2023 (Agencies):** India tsürtem rongnungi nungtugu gymnastics' asayar Dipa Karmakar nem International Testing Agency (ITA)-i ita 21 atema tenokdangba agütsüogo.

Dipa-i higenamine; beta-2 agonist amshiba poteta liasü aser iba tetezü iba ya tetoktepba mapang aser tanga mapang nunga achitsü memelar. Dipa indang sample ya 2021 küm October ita 11 nü agizüka liasü aser la nem 2023 küm July 10 nü tashi tenokdangba agütsüogo.

"Dipa Karmakar-i higenamine amshiba potetba sülen la nem ita 21 tenokdangba agütsüogo koba 2023 küm July 10 nü tashi asütsü," ta ITA-i sangdong ka ajanga metetdaktsü.

United States Anti-Doping Agency (USADA)-i ashiba agi, higenamine nung mixed adrenergic receptor activity keta lir aser iba yagi general stimulant ka ama inyaksangshitsü akok. Higenamine ya 2017 küm tenokdakba agütsüba WADA indang list nung züngoksema liasü.

Dipa, shiba 2016 küm Rio Olympics nung jenjang pezübuba nung tembanga kanga nungtugu aküm, la tatemsa Baku nung FIG World Cup asayaba mapang shilem agia liasü, kong la vault final-i ai ajisüaka takok mongutet aser la



Dipa Karmakar

balanced beam event nung top 8 metongteti liasü.

La 2017 küm ACL yirua surgery agia liasü. Kasa timtem ya 2018 küm Asian Games asayaba mapang tanaben sütet aser iba ajanga la artistic team final nung shilem magitettsüsa aküm. Iba sülen taruba küm la Asian aser World Championship nung masayatet aser Tokyo Olympics nunga masayatetsüsa aküm.

Iba tenokdangba agütsüba tetezü arishi küm 29 tain asayar ya Apparatus World Cup Series (Cottbus, Doha, Baku, Cairo) pezüprongla nung aser World Challenge Cup Series trok nungi asem nungbo shilem magitettsü. La Antwerp nung 2023 World Championships (September 23-October 8) nungbo asayatetsü akok koba Olympics qualifier event ka asütsü.

## BILEMDANGANG

"Teyaritep agi anünga aliba lokti tejaklei aotsü tasak."